

Bundesversammlung

Assemblée fédérale

Assemblea federale

Assamblea federala



Sin ils stgalims da la Chasa federala

Igl è stà durant ina da questas emissiuns politicas ch'ella odiava normalmain. Betg ch'ils temas politics na l'interessavan, ma ils parlamentarists che cumbattan in l'auter en l'arena da las medias, ils talkmasters sco picadores d'operetta ed il public che dumbra ils puncts davent da las tribunas, na grazia, quai na duvrava ella betg. Ses um, lez sa divertiva cun quests cumbats fauss. Sco sociolog. In bel alibi. En vardad na pudeva Jean-Robert simplamain betg resistar a la fascinaziun da questa cuchera curiosa. Vus avessas stuì vesair el, cun il mintun penderlant e la bucca averta, a siglir d'in program a l'auter e consumar sin tut ils chanals las Ultimas Novitads. Jean-Robert "s'infurmava". Ella però, ella preferiva il radio, persvasa che las vuschs din main manzognas che las fatschas.

En sia cuschina metteva ella ils tagliers e la pusada en la maschina da lavar giu e scurlattava la tuaglia sin il balcon. Cura ch'ella aveva finì questas lavurs, cuiva ella a sasezza in toc tschigulatta naira ed in lev suspir avant che da seser sper ses Teleaspectatur. Cun in'illustrada sin la schanuglia - evitond da far ramurs cun volver las paginas (Jean-Robert na supportava betg quai) – empruvava ella da far ils plets cruschads. Ma igl era impussibel da sa concentrar, la cacofonia universal ennivlava talmain sia percepziun. Alura steva ella en pe, sa stendeva susdond e bandunava la stiva annunziand dad aut ch'ella giaja a leger en ses letg. Jean-Robert la suandava var duas uras pli tard. Cun in'egliada persa admetteva el d'avair sfarlattà sias cellas grischas cun "guardar stupiditads", ella scheva ch'el saja in masochist, el vulveva il dies ed empruvava da sa durmentar malgrà che la lampa da notg facheva ina clerezza sco a Versailles. Il sociolog da passatemp expiava ses putgads cun in cudeschun metafisic fin ch'el deva a sasez l'absoluziun.

Jean-Robert viaggiava fitg bler. Sia interpresa da mobiglias da design prosperava, na, el na pudeva betg sa lamentar. Ella però, ella era savens suletta, e la chasa vida la deprimiva. Cura che lur suletta figlia ha maridà en ils Stadis Unids, ha ella vulì surpigliar ina lavur regulara, ma Jean-Robert ha scusseglià quai: memia veglia, memia pauc al current. Ella duaja plitost tschertgar ina lavur voluntara, per pudair gidar quels che hajan propi da basegn.

Ina saira, Jean-Robert sondava gist il martgà talian ensemen cun ses assistent signur Dumur, è ella sa sentida abandonada da l'entir mund. Installada davant la televisiun, confruntada cun la paupradad dals programs, ha ella cumenzà a zappar tras tut ils programs a la tschertga d'in maletg che avess pudì fascinar ella. Ella è sa fermada sin il chanal da l'Um. El siglientava il monitor! En in hui ha ella registrà tut: il culier avert sur il schal blau roial, la giacca da tgirom fin, il bist bain creschì, il cumportament suveran, e questa flomma en l'egliada, questa datschertadad calma.

Il studio era pli che plain. La debatta sa slegava per gronda part en dialect svizzer tudestg. In cusseglier federal da la Svizra franzosa, restrenschi en ses tudestg da scola caotic, sa



deva tutta fadia, ma aveva plitost difficultads. Ins dispitava la x-avla giada davart mesiras pli severas en connex cun la lescha d'asil, in tema ch'ella aveva persecutà cun atenziun dapi ch'ella sustegnava Amnesty International (senza che Jean-Robert saveva quai, pertge che lur opiniuns davart la schliaziun da "quels problems là" divergiavan a moda diametrala). Ses bun Jean-Robert! Ses um la pareva lunsch davent! E l'auter Um pareva uschè datiers! El discurriva en ses num, gea, el discurriva dad aut e quai ch'el scheva, avess ella pudì dir sezza, sch'ella avess gì il talent. Ella stueva en tutta cas chattar ora tgi ch'el era e nua ch'el steva, per exprimer ad el ses sustegn.

Sin la tribuna dal studio creschiva la tensiun, ils chaus eran chalirads, plaunsieu sa demascrava in suenter l'auter, ils plets ed ils gests scudivan las intenziuns zuppadas da mintgin. La tenuta curtaschaivla e ferma da l'Um percenter, ses plets moderads e sia segirezza, mussavan uschè evidentamain la rigiditad spiertala dals auters participants, ch'ella ha traplà sasezza ch'ella applaudiva ad el (sche Jean-Robert ma vesess, ma laschass el immediat serrar en, aveva ella giubilà). Tanta grondezza visavi tanta bassezza! Tge Um! Tgi è el, tgi è el pomai?

L'Um era deputà al Cussegl naziunal. In Svizzer tudestg tras e tras, e sco quai ch'ella aveva pudì engiavinar, plitost dal center sanester che dal center dretg. Ella ha mess en funcziun ses computer, è navigada sin l'Internet ed è arrivada sin la Website uffiziala dal parlament svizzer. Ella è sa divertida da guardar tras la glista ed ils purtrets dals Duatschient dal Cussegl naziunal, è flanada sur las fatschas da quests valurus Represchentants dal pievel, ed ha alura cliccà sin il num da l'Um, per vesair ses curriculum vitae e - oh tge plaschair - sia adressa dad e-mail. Ella è sa messa a scriver in e-mail entusiastic. E si e davent cun la brev, ha ella murmurà, sa fultschond sut ses lenziels frestgs. Ella è s'approfundada en ina dultscha sien, ils viertgels dals eglis serrads, davant la glischur dorada d'ina bellezza damaun da zercladur.

Ella è sa dasdada a las diesch ed è currida tar ses laptop. Nagut, rien, nada. La dischillusiun è stada gronda, ma immediat è la Raschun vegnida en agid: quai era bain tut normal, la sessiun da stad aveva gist cumenzà, l'Um era surchargià, n'aveva el forsa da far nagut auter che da guardar ses e-mails? Na, suenter sia prestaziun bravurusa en la debatta, aveva el bavi in pèr magiels per sa recrear, e n'aveva betg pudì clauder egl, turmentà dal plan da termin da l'auter di. Davos la tenuta ferma e maiestusa da l'Um sa zuppava in uman sensibel cun in ego pli fragil che quai ch'el avess giavischà; el steva segiramain mal ch'el n'era betg ò pli fitg en l'offensiva en la discussiun dad ier ... Igl era pia sia obligaziun civica da consolar el puspè.

D'ensolver ha ella bavi in té, ha mangià in jogurt ed in mail, ed è sa messa a la lavur. Ella duvrava in text motivà, bain structurà ed irresistibel. Las frusas culavan, la tastatura deva il tact, las flurs retoricass sautavan enturn ils compliments: Vus avais mantegnì contenance e dignitad, ed en quest ocean d'arguments tendenzius essas Vus As auzads milli miglias sur las mars. Mo vinavant uschia, giu cun il populissem e finì cun las tschantscharias dals politichers!

Pli tard, suenter avoir fatg la laschiva e las cumissiuns en la pasternaria da la chantunada, ha ella realisà che ses text cumpigliava passa tschintgmilli segns, senza ils spazis vids, quai che prendeva ad el mintga schanza da vegnir legì enfin la fin. Ella al ha amputà per duamilli segns, al ha memorisà en ses Documents avant che cliccar sin *trametter-retschaiver*. Ella ha



stranglâ giuaden sia omletta tadlond las novitads al radio. Nagina intervista, betg in sulet segn da ses erox. A partir da las set e mesa è ella navigada tras ils trais chanals da televisiun, senza dapli success. Evidentamain na saveva l'Um betg vender sasez bain avunda per vegnir cumprà da las medias.

Avant che ir a letg ha ella consultà sia posta electronica. Oh miracul, l'Um l'aveva respondi. Profundamain commovì da Voss plets gentils, cordials salids. Curt e bain, avess ses um beffegià. Mes char Jean-Robert! Tschintg dis davent e gnanc in telefon! Bah! Pli gugent quai che sias paraulas da viagiatur da commerzi. L'Um, lez era s'annunzià, e quai era il principal. Ella ha stampà ses messadi, ed alura ha ella bittà el immediat en il limbo dal chanaster da palpìri virtual: ins na saveva mai, cun questas smaladidas maschinas, sch'insatgi vuleva forsa spiunar ora ella!

La notg ha ella siemià da Berna, la citad, nua ch'ella aveva abità passa diesch onns gist suenter sia maridaglia. In bellezza temp, nua che Jean-Robert aveva uraris da lavur previsibels, ed avunda temp per ella las fins d'emna. Els avevan ina legra clicca d'amis romands e faschevan cun quels regularmain festas, spassegiadas e picnics a las rivas da l'Ara u en ils enclars da Bremgarten. En lur vita comunabla traglichava la citad veglia sco in sulegl. Ditg è ella spassegiada en patratgs tras la citad ed alura ha ella inventà spontanamain in'oda sin il plaz da laatedrala, avant che la ridicolezza da sia prestaziun ha mess ella puspè sin terra. Tuttina ha ella scrit l'essenzial en in document da Word ch'ella ha tramess a l'Um, en l'annexa.

L'oda cumenzava uschia: "Sajas salidada, Chapitala da mia giuventetgna, Patria da mes tat e da mes basat. Jau vi dechantar la splendor da tias chasas patrizianas, il scharm da tias funtaunas coloradas, da tias arcadas; Tes cor da molassa batta dapi tschientaners en il ritmus da l'inschignusa Tur da l'Ura. Milli grazias a tai, o Glisch da la Confederaziun, ti che das dapi ils origins dal stadi federal albiert a nossa Sublima e Nova Allianza, ti che has costruì sin la collina sur il flum la maiestusa pastizaria ch'ils Romands ed ils Tessinai numnan Palais fédéral e Palazzo federale."

Jau aud Vus enfin qua, signur cusseglier naziunal. Vus surris, ma Vus ma rendais gentilmain attenta che Palais u Palazzo èn terms da l'Ancien Régime. Quai ha da far cun il fatg che nus Latins restain nunpussaivels nostalgichers da la pompa guvernamentala, en la sumbriva da la Frantscha u da l'Italia. Per Vus è quai simplamain il "Bundeshuus" e la cumparegliaziun semantica explitgescha bler. Per ils Svizzers tudestgs è quest edificzi nobel ina sort da Chasa da Famiglia, opulenta e quietanta, nua che la parentella sa raduna quatter giadas l'onn per reglar las fatschentas currentas da la cuminanza ereditara naziunala. Sut la conciliaziun da Clau da Flia e la surveglianza dals Trais Confederads, vegn administrà e legiferà, planisà, budgetà, evaluà e supervisiunà, vegn dispiatà tranter dus cussegls, diesch pausas en la cafeteria e tschients pass pers en la sala eponima.

Cura ch'ella ha gi il curaschi da leger ses text anc ina giada, èn sias vistas sa cotschnidas: Co aveva ella gughegià, ella che aveva mo in magher licenziat en giurisprudenza, ella che n'aveva, tenor Jean-Robert, naging'idea da strategias da partida bain ponderadas? Ella ha s'imaginà l'Um, co ch'el raquintava als collegas da fracziun da sias abstrusitads. Alura è ella vegnida malsegira, ha emblidà da tschanar, è sa zugliada en ses letg e n'è betg pli sa muvida.



A las otg era ella già en pes ed è bunamain ida en svaniment cura ch'ella ha decifrà ils plects da l'Um che glischavan sin ses monitor. Vossa poesia divertenta m'ha plaschi fitg bain, Vossa visiun singulara dal foss da rösti – igl è ina gronda satisfacziun per nus da survegnir in resun, ina vaira reacziun, nosssa rolla vegn percepida mal en la populaziun, na targlinai betg, jau legel cun plaschair Voss texts. Cordialmain. Ella ha concedì a sasezza in ensolver abundant ed ha prendì il bus per il center. Ella è flanada tras las fatschentas, n'ha betg pudì resistar ad in bellezza vestgì da glin mellen strom cun decolté ed ha sblundregià sin via a chasa il supermartgà. E vers la fin dal suentermezdi è ella sa messa a la lavur.

Stimà signur cusseglier naziunal, en mia ultima epistla hai jau descrit a Vus la citad da Berna sco quai che jau l'hai en memoria, Vus avais legì tranter las lingias, Vus m'avais pia perdonà il kitsch vulì da l'exercizi. A Berna hai jau vivì cumpletmain senza quitads, la Chasa federala fascheva part da mes conturn, ma jau n'hai mai gì il giavisch u mirveglias d'entrar. Da quel temp devi franc era indiscreziuns e divers scandals, ma els n'eran betg temas en la pressa da boulevard, ils correspundents publitgavan lur sensaziuns mo spargnusamain, ils schefredactors e lur patrons eran precauts ed il Funcziunari Federal era in um onest, per definiziun. Ins scheva ch'el fetschia lavur da rutina, ins fascheva beffas sur da sia plaunezza; el n'aveva nagina fantasia, ma persunter in'etica irreproschabla.

Ils parlamentarists percunter stevan plitost già en il center da criticas seriusas. Oz èn questas criticas s'augmentadas, quai è la consequenza logica d'ina pli gronda vesavladad, ch'els promovon savens sez. En num da la trasparenza e dal dretg da vegnir infurmà, vegn il burgais-electur sepulì sut ina lavina da detagls biografics. Las confessiuns tanschan dal *coming-out* fin als chavels artificiali, dal questiunari da Proust, stentus d'emplenir, fin a la rubrica da boulevard dal gasettin da la dumengia. Strusch che l'enviern è qua servan els a nus ils receipts da biscuits d'ina Presidenta da partida e las regiuns da skis preferidas da las Eminenzas da l'assemblea federala.

Ils clichés concernent Vossa casta n'èn sa midads betg zic. Ins di che Vus gaudias in'immunitad quasi medievala, survegnias indemnizaziuns exorbitantas, diarias colossalas, ed ins cumprova a nus cun fotografias che Vossa sedia parlamentara As serva sulettamain per sfegliar en las gasettas u per tippar sappia Dieu tge sin Voss laptop, mess a disposiziun da *Mutter Helvetia* (premess che Vus sajas en sala cura ch'i n'è betg votaziuns, quai che n'è betg adina il cas, il cuntrari). Schizunt da l'intern dal seragl vegnan nutridas questas accusaziuns: noss Elegids sajan tuts carrierists, i giaja ad els mo per la pussanza, ed els na conuschian betg ils quitads dal Svizzer ordinari. Ils Represchentants dal pievel, enserrads en lur aquari, na represchentian en realitad betg pli el.

Sis minutas passà mesanotg è sia exaltaziun litterara vegnida interrutta andetgamain d'in telefon preoccupà da Jean-Robert. Signur Dumur sa chattia cun disturbis dal cor sin la staziun intensiva dal spital da Turin. Ella ha mussà compassiun ed ha insistì che ses um s'occupia dad el fin ch'el saja puspè sa remess dal tuttatatg. Na, jau n'hai betg lungurella. Gea, gea, ti ma mancas, chéri. Jean-Robert era uschè commovì da questa affecziun inadattada ch'el ha scutinà cun vusch tremblanta in adia nudibel tras il telefon.

Avant che ir a letg ha ella tramess a l'Um ses text, senza al repassar anc ina giada, pertge che quest sforz l'aveva spussà. Ella è s'approfundada en ina sien beada. Il chantinar da las merlotschas ha sveglià ella andetgamain, ed ella ha spert consultà sia chascha da brevs electronica. Fantastic, extraordinari, l'Um aveva reagì, la notg a l'ina e dudesch, sch'ins astga-



va crair a l'indicaziun da las uras electronica. El engraziava ad ella ed aveva plaschair ch'ella aveva mussà tanta giustia visavi sia vocaziun "uschè crititgada e tuttina uschè necessaria".

"I vegn adina reproschà a nus che nus sajan smarschuns e savens absents. Nus essan dentant in parlament da milissa, en il senn helvetic dal pled, e tuts u bunamain tuts da nus pratigteschan ina professiun, quai che franchisescha nus en la realitad dal pajais. Las gasettas che nus legiain uras a la lunga, sco quai ch'i vegn pretais? Las medias restan relais privilegiads, vulair ignorar ellas fiss utopic. Gea, Madame, in parlamentari che na legess betg las gasettas, fiss in nausch parlamentari, in parlamentari che na bandunass betg ina minuta sia sutga, fiss anc mender, in mitschafadias autentic e privlus! Co pon ins autramain tgirar ils contacts en ils corridors u s'inscuntrar per discussiuns informelas davos las culissas, en ils biros, ils cafés ed a la bar da l'hotel Bellevue? E co pon ins autramain far, negoziar e midar alianzas, tut tenor il svilup dals dossiers? Las maioritads na crodan betg giu da tschiel, ellas ston vegnir preparadas a lunga vista!

Ultra da quai stuessan nus esser tschorvs, surds e cumplettamain tgutgs per manchentar il spectacul permanent che sa splega sut las fanestras da la Chasa federala. Berna è in cudesch avert e la Piazza federala in labor politic sut tschiel avert. Prendai per exempel ils dus martgads emnils. I stat liber a nus d'ans maschadar tranter la fulla, da barattar ponderaziuns economicas cun las vendidras da verdura e lur clientella, da discutir il moratori davart organissem manipulads geneticamain cun ils purs da bio, in summa, da sondar la morala da las truppas, cumprond ina massa legums e kilos rosas da Berna.

Ed alura: pensai a la scena da drogas, i n'è betg uschè ditg enavos che quests fantoms ans accompagnavan cura che nus bandunavan las sedutas, ed ils purs ch'èn vegnids bagnads abundantamain da la polizia bernaisa, e las cohortas da dunnas grittentadas pervi da l'exclusiun da lur candidata, ed il "Manser Ecologicus" che fascheva chaltschiel sin la piazza per amur dal guaud tropic da Sarawak. Ed alura las bandieras, las banderolas, ils slogans scandads tras ils megafons! E quest ritual famus da nossa democrazia directa a chascun da referendum u d'iniziativas: las ceremonias tar la surdada da las suttascripziuns, cun lur cortegi da sherpas che emprovan da sa preschentar en la meglra glisch, sperond sin ina reportascha da televisiun avantagiusa ..."

Grondezza e Tragica da noss sistem da milissa! Pelvair, l'Um na temeiva betg l'exageraziun pedagogica! A la fin ha el confessà ad ella, en in tun pli famigliar, ch'el saja plaunsieu unfis, suenter tants onns da lavur intensiva, tut quests dossiers, sbozs da lescha refusads, l'impressiun d'avair negligì l'educaziun da ses uffants, l'atmosfera deprimentada resentida mintgant cura ch'el entria en sia chombra d'hotel. Per finir ha el annunzià ad ella sia proxima intervenziun parlamentara, "a la quala jau As envid, sche Vus vulais. Jau avess grond plaschair d'As introducir en ils misteris da nossa venerabla Chasa." Suandà dal numer da ses telefonin privat.

Ella ha duvrà l'entir avantmezdi per realisar tge che capitava cun ella. Ella aveva battacor cura ch'ella è sa decidida da telefonar ad el. L'Um n'era betg surstà, el ha mussà ina natiralezza sorprendenta. Cura ch'els han gi fixà la data da lur inscunter, ha el proponì ad ella da cuntinuar lur correspundenza. D'accord, ma tge vuleva el ch'ella al raquintia? N'emporta nagut, raquintai puspè da Berna, jau na conusch betg uschè bain la citad. Tge citad da Berna, aveva ella agiuntà, quella dal temp da mes ventg onns? Savais Vus in summa quants onns che jau hai, prezià signur? – Jau vegn strusch ad esser blier pli giuven, preziada dunna. Jau



stun mal, ma ussa stoss jau dir adia. Fin mesemna ad otg, jau m'allegrel fitg! Jau era, ha ella balbegià.

Berna, 1974. La Piazza federala è anc ina gronda piazza da parcar, che rebatta da las dispietas tranter ils automobilists. En mias regurdientschas è ella da di e da notg plain vita. Là inscuntr'ins tant ils Beatles chavellus da Köniz, ils hippies da Bümpliz cun in'aureola da fim da chonv, ils bonzs da Hare Krishna che murmuran lur mantras, sco era ils bavaders indigens bittads or dals bistros vischinants. Jau ma regord era bain da la stad: las terrassas emplenidas da turists tschuberlins, e durant las sessiuns questas damas memia smincadas che percurran ils passapes en minijupe e tatgs snuaivels.

Ina saira da fanadur, jau purtava mezza ina rassa curta e leva, aveva jau fatg giu cun amis da l'exteriur. Il "Bundesplatz", inditgà sin numerusas tavlas, na pudev'ins betg manchentar! Naivamain era jau ma postada davant la "Hohe Pforte". Diesch minutas pli tard èn automobilists libidinus, cun la fanestra averta, s'infurmads tar mai davart il pretsch da mes servetschs presumads. *Wifiou nimsch?* Jau hai scuvert lezza giada cun surpraisa ina da las fatschas las pli democraticas da nossa Agora federala.

L'anecdota n'era betg uschè divertenta. Ma tuttina ha l'Um ditg ad ella al telefon durant sia pausa da mezdi ch'el saja bunamain schluppà dal rir amez la debatta d'entrada. Alura ha el repetì ad ella las uras ed il lieu da lur inscunter. Quai pareva da star a cor ad el. Sco quai che las chaussas stevan a Turin na turnava Jean-Robert betg uschè prest, ha ella ponderà. Ella è pia sa decidida immediat.

Berna, zercladur 2005. Restructurada e liberada dal traffic nuninterrut, stat la Piazza federala puspè qua. Cuverta dal tuttafatg cun quarz da Val s. Pieder, traglischia ella sut las ventgasis funtaunas siglintas che simboliseschan ils ventgasis chantuns. Per tschertins è ella memia ascetica, per ils criticasters è ella survegliada mal e frequentada mal. Ils cloms da Cassandra eran stads d'udir gia avant l'inaguraziun: crappa uschè delicata, Vus vegnis anc a vesair ils palpiris tschufs, las scalgias da vaider, ils sgrafits e las tartagnadas, las nunciviltads da l'adiever.

Mes Intercity ha gì retard, jau vom en prescha vers la Chasa federala, mia minivalischa cun rodas davos mai. Igl è ina chalira narra. In pèr Parlamentaris en mongias-chamischa, la giacca sur las spatlas, chaminan dapi l'hotel Bären baterlond davant mai. Sin la piazza fan uffants da pigliar e givlan tranter las duschas fraidas, survegliads d'ina gruppa da seniors bernais, ch'èn sa postads sin la sava da la Banca naziunala. In batagliun da Giapunais circundescha in cicerone iperactiv. Mats cun chapitscha da baseball e bermudas unisex baterlan cun mattas perforadas da piercings, stendidas sin lur satgados, entant che davant lur nas sa mova in carussel da sutgas cun rodas cun pilots che tegnan si tavlinas. Sin il menu dal di dal Cussegl naziunal: l'autorisaziun contestada da la diagnostica da preimplantaziun.

Ils parlamentaris curran en la Chasa federala, jau m'annunziel tar il polizist che ha servetsch. In'emprova miserabla: gia dapi eternitads è mes tudestg svizzer ù a perder. Jau repet, questa giada en franzos, il motiv da mia visita. En la sclusa d'entrada auz jau mia bagascha sin in bindel rullant. Scanner da controlla ed jau sun a Cointrin, jau part en vacanzas, jau cur tras ils corridors, mes aviun sgola senza mai... Na, jau vom tras la sclusa da segirezza e m'avischin ad in pult imposant, nua che l'ordonanza ma supplitgescha da mussar la carta d'identitad. El m'annunzia tar mes ospitant. Jau spetg giudim la stgala monumentala, cun ils patrats en ils nivels.



Bainvegna en la Confederaziun! L'Um è pli pitschen che en la televisiun. Cun ina ferma strensida dal maun ed in'expressiun amiaivla, tschiffa el mia valischa e la depona en il local destinà per quest intent. En l'ascensur ma di el che ses pled entschaivia ussa proximamain. "Jau vegn da mezdi per Vus, e lura giain nus ensemen a gentar, Vus essas sa chapescha mes giast."

Catapultada en l'emprima retscha da la tribuna da visitaders, ves jau directamain sin las chavazzas da noss Parlamentaris. Ina sperta examinaziun mussa: las bluttas masculinas paran d'esser en moda, l'unifurma virila predominescha lunschor. E las dunnas? Nua èn las dunnas? Nua è sa zuppada la mesadad dal pajais, nua è mia vusch ida a perder, la quala jau dun tar mintga elecziun a quellas da mia schlattaina? E nua èn mias colurs?

Colurs hai en quest panorama magistral dal pictur Charles Giron, che penda en il fund da la sala dal cussegl. Sin ina sdrima da nivels d'ivur sgulatscha ina dunna rosa e niva sur il lai cotschen blau. En ses maun sanester tegna ella in romin d'uliver, cun il dretg mussa ella sin il prà dal Rütli, ina veritabla allegoria da la concordia, che duai inspirar las lavurs dals parlamentaris e da las parlamentarias. Da tuttas duas varts tronan en duas nischas surelevadas dunna Stauffacher (*Gertrud*) e signur Tell (*Wilhelm*). Bun, l'egualitad è restabilida! Grazia Trudi! Legiai il Guglielm Tell da Schiller: en realitad èsi ella, la Stauffachera, che sugerescha als trais Waldstätten l'idea d'ina "Union Sacrée", cunter ils lanfogts habsburgais. In concept che noss brav Tell, che incarnescha l'Acziun, sa stenta d'applitgar cun plaschair.

In tun giz dal microfon. L'Um stat davant il pult. Jau terminesch mias reflexiuns filosoficas. El n'è betg sa midà. Pleds calms, ina tenuta gentila, ma decidida, in tun persvadent. En l'assemblea èsi quiet. In mument istoric. Sin la tualetta da las dunnas ma frisesch jau anc ina giada e met si in pau lefzagl. El vegn a vegnir per mai, nus giain ensemen a gentar. Jau hai gi l'Idea. L'Acziun è sia part.

Anne Rivier, naschida il 1947, studis a Bienna e Neuchâtel. Dapi il 1997 è ella collavuratura libra da la gasetta emnila *Domaine Public* (columnas, feuilleton). Ella ha publitgà in raquint, *Histoire d'Adam K.*, en la revista *Intervalles*. In roman, *Bleu de Perse*, en la chasa editura *Editions de l'Aire*, 2003, ed ina collecziun da columnas, *Malley-sur-Mer*, *Editions de l'Aire / Domaine Public*, 2004.